

## EZKERTIAR BARRIEN AZKENEKO URTEA

Urtebete igaro da, polizgizon batek Beno Ohnesorge ikaslea il ebanetik. Martiri batena lez gomutaratu dabe ikasle erreboluzionarioak urtebetetzea. Europa osoa dardaratu daben ikasleen asarre ta ekintzaldi gogorrez idatzita dago, urteburu onek eskeintzen deuskun kontu liburua.

Beno Ohnesorge'ren eriotza osteko urte onek, ikasleen erreboluziñoa sutu dau. Kontzientzia asarratu bat iratzartu dau estudianteen eta beste gitxi batzuen artean. Gobernu, alderdi politikuak eta erri geiena, ikasleen kontra. Irakasleak eta sindikatua, batzutan, gobernuaren eta estudianteen kontra. Eta ikasle radikalenak, guztien eta guztiaren aurka.

SDS taldeak (Alemaniako Ikasle Sozialisten Alkartasunak) eroan dau ikasleen erreboluziñoa. Baiña urte luze onetan asko aldatu dira ikasleen asmoak, organizaziñoak be bai, ekintza metodua be bai; eta SDS berak be, buruzagitzea barritu bear izan dau. Mao Tse Tung'ek lez, «**martxa luze bat**» deituten deusoe urte oneri.

Ikasle taldeen artean, SDS da radikalea ta gogorrena, bai ideologian eta bai ekintzan. Radikaltasun onek emoten deutso buruzagitzea, duda barik; baiña baita kasualidadeak be. Eta jazo diran gorabeerak, obligatu egin dabe SDS, radikaltasun oneri metodu bat emotera.

### IKASLE SOZIALISTEN INDARRA

Orain urte bete, SDS taldearen indarrak ez eban bapere pin-tatzen. Hippy ideologizatu batzuk baiño ez ziran. Ule jario, barrigarri jantzita, buruan txapel euskalduna, euren «kanpamentua» Europako lurralde libre deklaraturik, moral xeble bategaz, uri andietako edozein «provo» taldegaz bardindu eitekezan. Alemaniako teleikusle guztiak dibertitzen ziran eurakaz. Urte onen buruan, SDS taldea indar politiku bildurgarri bat biurtu da: buruzagitzako gizonak «burges» jazten dira, txukun txukun berba egiten dabe, programatxu bat be borobildu dabe. Erreboluziñoa martxan dago, SDS'koak diñoenez. Eta kontrarioak, denpora zaarrak aztu gura ezean, politikan sarturiko Hippy batzuk baiño ez dirala leporatzen deutsee.

Tragedia baten eskenario biurtu da Alemania. Alandabe, tragedia onen asierea guztiz txatxarra izan zan. Bein baten, Sha deituten jakon gizon bat etorri zan Berlinera. Eta Sha kalean joateko sasoi, «tomatezko atentadu» bat egin gura izan eban mutil pare batek. Pantomima bat zan. Ganster andiak egiten daben lez, poliziarri abisatu ta dana égin eban: Sha asesinatuko eban! Mutillok, asesinatu sinboliku bat baiño ez eban gogoan. Poliziarri baiña, ez jakoz bromak gustetan nunbait. Laster azaldu eban atentadua: tomate ustelez egindako pastel bategaz Sha goitik beeraiño loitu gura eban mutillak. Lenengo auziorrazi au, beste barik amaitu zan: mutillak preso, eta Sharen edertasunak salbu urten eban.

Gizon ospetsu guztiak egiten daben lez, Persiako Shak be Operara joan bear eban gero. An egozan ikasleak protestatzen eta mutil bien askatasuna eskatzen. Asarratu zan polizia, animatu ziran ikasleak; eta zarraparra orretan burua galduta-edo, polizgizon batek tiro bat bota eban, bere ustez edo esanez aidera. Ez dakigu, tiroa itzulimurdika ibilli ete zan; ikasle baten buruan sartu zan beintzat. Beno Ohnesorge ez zan etxera joango.

Bigarren auziorrazi au amaitu zanean, Sha —Fausto'ren jenio txar au— etxera, Persiara, joan zan trankil trankil, andrea enperatriz koroatzera.

Alemanian, naziño guztia naastuta egoan. Kontuok garbituteko eskatu eban oposiziñoak. Berlingo gobernu sozialistea, poliziarren alde jarri zan, eta ez eban polizgizonaren izenik agertu gura. Alemaniako Unibersidade geienak barriz, auzi au tribunaletara eroateko eskatu eban. Berlingo gobernuak ez eban beste erremediorik euki, lengo alkatea kendu eta beste barri bat izentatzea baiño.

### SDS MOBIMENTUAREN GORABEERAK

Alemania osora zabaldurik egoan ordurako ikasleen mobimentua. Gau baten zabaldu zan. Eta mobimentu onen gidaritza SDS taldeari tokatu jakon. Erria ikasleak egoan sasoi onetan, eta SDS'koak ekintzara pasatu ziran.

Unibersidade osoaren barriratzasuna eskatu eban ikasleak. Parlamentuan, aldaketa proiektu bat sortu zan. Vietnamgo gerraren kontra ekin eutsoen ikasleak. Parlamentuak debate bat egin bear izan eban Vietnamgo gerrari buruz. Taktika txar bat izan zan: soldatu amerikanoak defendietan dabe Berlin, jentearen ustean beintzat; eta alemanak ez dabez aztu oraindiño Berlinen blokeoa ta amerikanoen laguntziñoa (aide zubia). Eta gerra ostein be, amerikanoak gomutapen ona itxi deutsoe aleman erriari. Erria, banandu egin zan: geienak amerikanoen alde ta ikasleen kontra. Judegu ta arabeen arteko gerran, agiriago agertu zan banaketa au: erria judeguen alde ta SDS'koak kontra. Ikasleen arteko batasuna be, arriskuan egoan onezkero: ezkertiar asko ziran judeguen aldekoak eta ikasle asko leiatu\* ziran judegueri laguntzen.

SDS'ko zuzendariak akats ikaragarri bat egin eban: ikasleen benetako interesen bidetik urten. Eta aleman erriaren gerra sasoi ta gerra osteko sentimentueri ez eutseen ezetariko begiramenik euki. Olan, erria asarratu eragin eban eta gogorke-riari bideak zabaldu. Orrexegaitik ez da aleman erria, frantsesak egin daben lez, ikasleen aldetik jarri.

### ERRIAREN ERANTZUNA

Gaiñera, demokrazia osoaren aldaketea gura eban ikasleak. Baiña erriak ez dau ori ondo ikusi: komunistatzat artu ditu, eta komunismua gomendio\* txarra da Alemanian. Gogorkeria giro onetan, probokaziñoak gaiñeratu ziran oraindiño, txarto egoana txartoago ixteko. Erria poliziagaz egoan, eta ikasle geienak mobimentu onetatik erretiratu egin ziran. Vietnamgo gerraren kontra manifestatzea ez da naikoa, ikasleen intereseri denpora luzean eusteko.

Aste Santurako erdi sosegaturik egoan giroa. Sua amatetan joian antza. Baiña orduan beste jenio txar bat agertu zan eskenarioan: fanatiku batek iru tiro jo eutsozan Dutschke ikasle buruari Berlingo kalean. Iru tiro onek barriri sutu ebezan ikasleak. Maitzaren lenengoa be, gaiñean egoan. SDS'koak barriri lortu eban, ikasleak euren aldera ekarte; eta urrengo egunak, Pazko egunak barik, Apokalipsiko egunak izan ziran: benetako gerra koxkorak egin ziran kaleetan.

Ezbearraldiko\* lege proiektuaren kontra egin diran ekintzaldiak, SDS'koak zuzendu dabez. Baiña ikasleen suak, ezin sutu izan dauz erria ta langillera.

### ZER JAZOKO DA GERO?

Frantziako gorabeeren indarrak, parentesi baten itxi dau Alemaniakoena. Ikasleen batasuna, ostera be apurtzen asi da antza. Indarrak makaltzen doaz urrean. SDS mobimentuari asmo konkretu barriak falta jakoz nunbait.

Baiña posturak gogor gogortuta dagoz. Posporo guztiak gatatute dira ba? Ez. SDS'koak, galdu egin dabez posporoak, besterik ez. Ostera be aurkituko dituen ala ez, orixe da ez dakiguna.

Jose Azurmendi